



## 1068 **FAKTOR KETERLIBATAN BELIA MUSLIM MALAYSIA DENGAN KEGIATAN TERORISME: ANALISIS SUDUT PANDANG PENGUATKUASA & PANEL PEMULIHAN**

Mohd Khairul Naim bin Che Nordin & Muhamad Syafriz bin Mhd Nazer

Jabatan Akidah & Pemikiran Islam, Akademi Pengajian Islam Universiti Malaya, Kuala Lumpur, Malaysia.

### **Abstrak**

*Makalah ini mengkaji faktor-faktor keterlibatan belia Muslim di Malaysia dengan kegiatan terorisme. Pelbagai teori telah dikemukakan oleh para penyelidik bagi mengenalpasti faktor-faktor ini secara umum namun kajian yang dijalankan menunjukkan faktor tersebut berbeza dari satu negara dengan negara yang lain. Justeru, bagi mendapatkan data langsung berkenaan faktor penglibatan teroris di Malaysia, kajian ini telah menjalankan temubual mendalam secara semi-struktur dengan pihak-pihak yang terlibat langsung dengan aktiviti pencegahan, pengawalan dan penguatkuasaan terorisme iaitu Bahagian Anti Pegganas (E8) Cawangan Khas, Polis Diraja Malaysia dan ahli-ahli panel pemulihan tahanan teroris. Unit E8 berperanan mengenalpasti dan menangkap suspek dan pesalah pegganas manakala ahli panel pemulihan berperanan berinteraksi seterusnya menjalankan proses deradikalisasi terhadap mereka. Selain itu sebagai data sokongan, kajian ini turut menjalankan temubual dengan ahli akademik dan keluarga pesalah yang ditahan di bawah Prevention of Terrorism Act (POTA) atas kesalahan terorisme. Hasil temubual tersebut seterusnya dirumuskan secara analitikal berpandukan rujukan perpustakaan yang didokumentasikan. Kajian mendapati terdapat lima faktor utama yang menarik belia menyertai terorisme iaitu faktor psikologi dan personaliti, faktor pengetahuan dan kefahaman agama, faktor perkembangan media sosial, faktor ideologi dan faktor konflik di negara umat Islam. Setiap faktor tersebut berperanan menjadi faktor penolak dan penarik kepada belia untuk menyertai kegiatan terorisme. Rumusannya, pengenalpastian terhadap faktor-faktor ini amat penting dalam usaha semua pihak untuk mencegah pemikiran terorisme dari terus berkembang di Malaysia khususnya dalam kalangan belia.*

**Kata kunci:** *Belia Muslim, Malaysia, Terorisme, Penguatkuasa, Deradikalisasi.*

### **Pendahuluan**

Terorisme merupakan suatu faham yang menjadikan pendekatan kekerasan, intimidasi dan keganasan sebagai satu kaedah untuk mencapai tujuan. Ia demi mengimplikasikan rasa panik, takut dan gerun pihak kerajaan dan masyarakat terhadap organisasi atau kumpulan mereka seterusnya bermatlamat untuk pihak-pihak berkepentingan yang disasarkan tadi akur dan patuh terhadap kehendak mereka. Justeru, pendekatan yang digunakan seperti pengeboman, pembunuhan secara rambang atau bersasar dan lain-lain secara umumnya digunakan oleh kelompok teroris sama ada di tahap nasional atau antarabangsa. Kajian oleh Global Terorisme Data (GTD) menunjukkan telah berlaku lebih daripada 170,000 serangan domestik dan



antarabangsa yang telah berlaku semenjak tahun 1970 sehingga 2016.<sup>1</sup> Sementara purata secara kasar menunjukkan sebanyak 1% daripada jumlah serangan mengakibatkan 25 atau lebih kecederaan, manakala selebihnya mengakibatkan serangan yang meragut lebih 120,000 nyawa manusia.<sup>2</sup>

Berdasarkan data di atas serta kajian-kajian tinjauan sejarah menunjukkan terdapat pelbagai kumpulan dan organisasi dengan latar belakang, ideologi dan lokasi berbeza yang melihat kerelevanan terorisme sebagai satu faham dan pendekatan sehingga ia terus berkembang pada skala global sehingga ke hari ini. Melihat kepada perkembangan moden, gelombang terorisme boleh dikatakan bermula di era Reign of Terror oleh kumpulan Jacobin pasca Revolusi Perancis, kemudian dikembangkan lagi oleh kumpulan anarkis di Eropah abad ke-19, disusuli gerakan nasionalis sebagai satu bentuk perjuangan anti kolonialisme di era penjajahan dan seterusnya oleh kelompok sayap kiri baru (New Left) di tahun-tahun 1960-1980an. Menurut Rapoport, gelombang terorisme semasa berteraskan agama dengan kemunculan beberapa kumpulan teroris yang berjuang atas nama agama.<sup>3</sup> Gelombang ini akan terus wujud dengan kemunculan kumpulan lain yang berjuang atas dasar yang berbeza pula seperti perkembangan dan kelahiran kelompok sayap kanan radikal dalam kalangan White Nationalist dasawarsa ini yang walaupun serangan dilakukan tertumpu secara lokal namun ideologinya berkembang di tahap global.

Faktor kelangsungan setiap gelombang adalah ideologi yang menjadi pemangkin kewujudan sesuatu kumpulan teroris serta dokongan belia yang berperanan penting menyambung matlamat perjuangan kepimpinan generasi terdahulu. Justeru, usaha perekrutan individu-individu berpotensi dalam kalangan belia menjadi antara aktiviti utama sesuatu kumpulan. Sehubungan itu, kajian ini bermatlamat mengkaji faktor-faktor keterlibatan belia Malaysia dengan kegiatan terorisme menurut perspektif dan sudut pandang pihak yang terlibat secara langsung dengan kegiatan tersebut iaitu Polis Diraja Malaysia dan ahli panel deradikalisasi tahanan teroris. Data sokongan akan turut dianalisis dari ahli akademik dan keluarga pesalah yang terlibat dengan kegiatan terorisme.

### **Terorisme dan Pendekatan Pencegahannya di Malaysia**

Dalam konteks Malaysia, negara ini turut tidak terlepas dari kemasukan anasir terorisme khususnya yang bercorak motivasi keagamaan (*religious motivation*). Antaranya ialah kemunculan Kumpulan Mujahidin Malaysia (KMM) yang ditubuhkan oleh mereka yang pernah terlibat dalam peperangan antara kumpulan Mujahidin dengan Soviet Union di Afghanistan dengan matlamat menggulingkan pemerintah sedia ada dan menubuhkan Daulah Islamiyyah

---

<sup>1</sup> Department of Homeland Security, Centre of Excellent University of Maryland, Study of Terrorism and Response to Terrorism, <http://www.start.umd.edu/research-projects/global-terrorism-database-gtd>.

<sup>2</sup> Ibid.

<sup>3</sup> David Rapoport, the Four Waves of Modern Terrorism, (<http://international.ucla.edu/media/files/Rapoport-Four-Waves-of-Modern-Terrorism.pdf>), 47.



Nusantara merangkumi Malaysia, Indonesia dan Selatan Filipina.<sup>4</sup> Pasca peristiwa 11 September 2001 yang membawa kepada pencerobohan tentera Amerika Syarikat di Iraq dan Afghanistan memberi inspirasi dan pengaruh besar kepada segelintir umat Islam untuk menyertai apa yang dinamakan sebagai ‘jihad menentang kuffar’. Semangat tersebut dipenuhi apabila wujud seruan-seruan ‘jihad’ oleh beberapa kelompok militan dan radikal Islam ketika meletusnya perang di Syria pada tahun 2011. Kemuncaknya apabila Ibrahim Awwad Ibrahim al-Badri atau nama samarannya Abu Bakr al-Baghdadi mengisytiharkan dirinya sebagai Khalifah al-Dawlah al-Islamiyyah fi al-‘Iraq wa al-Syam (Daesh) atau Islamic State of Iraq and the Levant (ISIL/ISIS) pada 29 Jun 2014 dan menyeru semua umat Islam untuk mempertahankan ‘khilafah.’

Rekod polis menunjukkan sejak 2013 sehingga 2018, seramai 102 rakyat Malaysia telah pergi ke Syria untuk menyertai ISIS dan daripada jumlah itu, sebanyak 37 telah terbunuh.<sup>5</sup> Impak terorisme turut memberi kesan di negara ini melalui ancaman dalam bentuk fizikal. Sebagai contoh, serangan bom di kelab malam Movida di Puchong, Selangor pada 28 Jun 2016 oleh dua individu yang mengaku menyokong ISIS telah mengakibatkan lapan orang awam cedera .<sup>6</sup>

Di samping itu, data dari Polis Diraja Malaysia (PDRM) menunjukkan pola unjuran mereka yang terlibat dengan gerakan terorisme adalah semakin muda iaitu antara umur 20 ke 30 tahun berbanding lebih berusia sebelum ini. Bahkan terdapat cubaan merekrut remaja seawal usia 14 tahun melalui media sosial yang dapat dijejaki PDRM.<sup>7</sup> Berdasarkan rekod PDRM juga sebanyak 404 kes tangkapan atas kesalahan terorisme dilakukan dengan 328 tangkapan tersebut adalah dalam kalangan belia.<sup>8</sup> Jumlah tangkapan melalui Akta Pencegahan Keganasan 2015 (POTA) bagi tahun 2014-2017 pula ialah berjumlah 28 orang dengan 19 darinya berumur antara 20-35 tahun manakala selebihnya iaitu 9 orang berumur 36-60 tahun.<sup>9</sup>

Beberapa data yang dikemukakan di atas menunjukkan keseriusan masalah terorisme di negara ini khususnya dalam kalangan belia. Langkah menghentikan terorisme tidak memadai melalui pengenalpastian aktiviti terorisme semata tetapi turut perlu didahului dengan pencegahan. Menyedari hakikat terbabit, maka kerajaan telah memperkenalkan beberapa rang undang-undang

<sup>4</sup> Kamarulnizam Abdullah, Kumpulan Mujahidin Malaysia (KMM) and Jemaah Islamiyah (JI): The links. *Journal of Policing: Intelligence and Counter Terrorism* (2009), 29-46.

<sup>5</sup> Balu Pejuang Negara Islam Terbunuh Di Syria Pulang Ke Malaysia, <https://www.benarnews.org/malay/berita/my-wanita-syria-181025-10252018185716.html>

<sup>6</sup> Astro Awani, Bom Movida: Dua lelaki dipenjara 25 tahun, <http://www.astroawani.com/berita-malaysia/bom-movida-dua-lelaki-dipenjara-25-tahun-137227>

<sup>7</sup> Malaymail, Islamic State recruiter targeted local schoolboy, police say, <https://www.malaymail.com/news/malaysia/2014/10/14/islamic-state-recruiter-targeted-local-schoolboy-police-say/763167>; Astro Awani, K'jaan sedia kertas putih kegiatan keganasan melibatkan rakyat M'sia, <http://www.astroawani.com/berita-malaysia/kjaansedia-kertas-putih-kegiatan-keganasan-libatkan-rakyat-msia-47177>

<sup>8</sup> Temubual Pegawai 1, Unit E8, Bahagian Counter Terrorism, Bukit Aman pada 12 Julai 2018 di Ibu Pejabat Polis Diraja Malaysia, Bukit Aman.

<sup>9</sup> Statistik tangkapan elemen Daesh dibawah POTA, Portal Data Terbuka Malaysia, [http://www.data.gov.my/data/ms\\_MY/dataset/statistik-tangkapan-elemen-daesh-dibawah-pota-2014-2017/resource/74a08629-654e-4927-b8a4-6c734ea1019f](http://www.data.gov.my/data/ms_MY/dataset/statistik-tangkapan-elemen-daesh-dibawah-pota-2014-2017/resource/74a08629-654e-4927-b8a4-6c734ea1019f)



yang kemudian telah diluluskan oleh Yang di-Pertuan Agong yang fungsinya menyekat pengaruh terorisme dari terus berkembang.

Antaranya ialah Akta Pencegahan Keganasan 2015 atau Prevention of Terrorism Act 2015 (POTA) yang memperuntukkan pencegahan pelakuan atau sokongan bagi perbuatan keganasan melibatkan organisasi teroris yang tersenarai di negara asing.<sup>10</sup> Di samping itu, Akta Kesalahan Keselamatan (Langkah-langkah Khas) 2012 (SOSMA) diperkenalkan sebagai satu langkah pencegahan dengan mengekang aktiviti keganasan dari berlaku seterusnya mengekalkan ketenteraman awam. Dalam konteks ini, akta tersebut menggariskan terorisme sebagai keganasan terancang terhadap orang atau harta, atau menyebabkan sebilangan besar warganegara takut terhadap keganasan tersebut. Ia turut diluaskan lagi dengan apa-apa sahaja ancaman yang membangkitkan perasaan tidak setia terhadap Yang di-Pertuan Agong, memudaratkan ketenteraman awam di Malaysia serta ancaman berupa tindakan untuk melaksanakan perubahan secara tidak sah tanpa melalui undang-undang.<sup>11</sup>

Justeru akta yang diperkenalkan ini bersifat mencegah sesuatu tindakan terorisme sebelum ia berlaku. Atas asas tersebut apa jua aspek ancaman yang mengundang pada perlakuan dan tindakan ganas akan diberi perhatian oleh pihak berkuasa. Oleh kerana Yang di-Pertuan Agong merupakan pemimpin tertinggi Malaysia maka apa-apa sahaja ancaman hatta yang berkait mencetuskan perasaan tidak setia kepada baginda merupakan satu kesalahan yang tertakluk kepada undang-undang ini. Penjelasan di atas menunjukkan keseriusan kerajaan membendung gejala terorisme dari wujud dan berkembang di negara ini.

### **Kajian Lepas**

Berdasarkan data-data penangkapan yang dinyatakan di atas menunjukkan seakan wujud faktor pendorong yang mencetuskan kemahuan segelintir rakyat Malaysia dalam kalangan belia untuk terlibat dengan terorisme walaupun dasar penguatkuasaan kini lebih diperketatkan. Perkembangan pesat teknologi maklumat serta perubahan hubungan antarabangsa telah menyaksikan lahirnya terorisme bentuk baru yang berbeza dengan pendekatan lama. Tidak seperti generasi terdahulu yang mana kegiatan mereka boleh dikenalpasi melalui sel-sel bawah tanah dan pusat kegiatan rahsia yang ditubuhkan, tren kini menyaksikan kumpulan teroris yang hanya beroperasi melalui internet. Ia menyukarkan pihak berkuasa untuk mengesan mereka serta membataskan kemampuan untuk menyekat golongan yang berpotensi terlibat. Ini kerana, teknologi yang sama digunakan untuk menyebarkan propaganda untuk menarik sokongan seterusnya memberi inspirasi kepada mereka yang berminat.

Oleh kerana itu, kajian oleh Institut Penyelidikan Pembangunan Belia Malaysia (IYRES) pada tahun 2015 menunjukkan internet sebagai faktor pendorong dan saluran media yang memberi

<sup>10</sup> RUU Pencegahan Keganasan 2015 (POTA) dibentang di Dewan Rakyat, <http://www.astroawani.com/berita-malaysia/ruu-pencegahan-keganasan-2015-pota-dibentang-di-dewan-rakyat-56747>

<sup>11</sup> Astro Awani, 10 fakta anda perlu tahu tentang SOSMA, <http://www.astroawani.com/berita-malaysia/10-fakta-anda-perlu-tahu-tentang-sosma-76148>



pengaruh besar kepada penyebaran doktrin terorisme. Sebanyak 50.4% saluran media yang digunakan bersumberkan Facebook dan 35% Youtube. Manakala faktor persekitaran yang mempengaruhi penyebaran ideologi ISIS adalah bersumberkan rakan siber iaitu 14.1% iaitu peratusan terbanyak berbanding faktor-faktor lain.<sup>12</sup>

Berkait faktor pengetahuan pula, kajian oleh IYRES dan Universiti Malaysia Kelantan (UMK) pada tahun 2012 ke atas mahasiswa Universiti Awam (UA) berumur 18 hingga 22 tahun yang beragama Islam menunjukkan masih sedikit belia Malaysia yang mengenali dan memahami tujuan perjuangan kumpulan radikal seperti ISIS. Pada aspek pemahaman, 45.9% responden tidak pasti berkait pebezaan jihad dalam Islam sama ada perintah membunuh atau perintah mempertahankan diri dari serangan. Begitu juga hampir separuh iaitu 46.4% responden menjawab tidak pasti berkenaan apakah boleh disebut jihad apabila ada kesanggupan mengorbankan kesucian untuk melayani nafsu ahli kumpulan ISIS. Kajian ini turut menunjukkan media sosial sebagai medium penting yang mampu mempengaruhi dan mendorong belia Malaysia terlibat dengan kumpulan ISIS.<sup>13</sup>

Di samping itu, kajian berkait penerimaan dan penolakan belia kepada ideologi ISIS telah dijalankan oleh IYRES dan Universiti Utara Malaysia (UUM) pada tahun 2015. Dapatan kajian menunjukkan 19.5% responden dalam kalangan pelajar Institut Pengajian Tinggi menghormati fahaman politik ISIS, 19.5% sedia menyumbang wang ringgit untuk kumpulan ini, 9.3% bersetuju dengan menyertai ISIS boleh mendapat balasan syurga dan 4.8% mengajak rakan-rakan untuk menyokong ISIS. Walaupun secara umumnya dapatan menunjukkan bahawa majoriti pelajar IPT didapati menolak perjuangan ISIS namun, masih terdapat sebilangan kecil pelajar yang masih belum pasti dan ada yang didapati bersetuju, menerima dan menyokong perjuangan tersebut.<sup>14</sup>

Selain itu, kajian faktor yang mempengaruhi kecenderungan keterlibatan belia di Malaysia dalam gerakan Islam radikal mendapati bahawa faktor pemahaman agama amat memainkan peranan penting dalam menentukan penerimaan dan penolakan mereka terhadap gerakan ini.<sup>15</sup> Bahkan faktor tersebut lebih signifikan berbanding pengaruh kawalan dan media.

Kajian lebih komprehensif telah dilakukan oleh IYRES dalam mengenalpasti profil belia yang terlibat dengan kegiatan terorisme pada tahun 2017.<sup>16</sup> Pembangunan profil dilihat penting bagi mengenalpasti dorongan dalaman dan luaran yang mempengaruhi belia serta mengkaji ciri

<sup>12</sup> Institut Penyelidikan Pembangunan Belia Malaysia, Kajian Pembangunan Kesejahteraan-Pendidikan Agama dan Penglibatan dalam Gerakan Islam Radikal di Kalangan Belia Malaysia, 2015.

<sup>13</sup> Nursalihah Ahmad Raston et. al., Persepsi Belia di Malaysia Terhadap Jihad dan Gerakan Islam Radikal (Kuala Lumpur: Unit Penerbitan IYRES, 2016).

<sup>14</sup> Che Mohd Aziz Yaacob et. al., Tahap Kefahaman dan Potensi Penerimaan Pelajar IPTA Terhadap Gerakan ISIS, Kuala Lumpur: Unit Penerbitan IYRES, 2016).

<sup>15</sup> Nursalihah Ahmad Raston et. al., Faktor-Faktor Yang Mempengaruhi Kecenderungan Keterlibatan Belia di Malaysia dalam Gerakan Islam Radikal (Kuala Lumpur: Unit Penerbitan IYRES, 2016).

<sup>16</sup> Institut Penyelidikan Pembangunan Belia Malaysia, Kementerian Belia dan Sukan Malaysia, Ringkasan Eksekutif Profil Belia dalam Kegiatan Ekstremisme (Putrajaya: KBS, 2017).





perlakuan mereka. Seramai 39 orang responden dalam kalangan belia yang disabitkan kesalahan di bawah SOSMA, POCA dan POTA telah dijadikan sampel kajian melalui edaran soal selidik manakala 11 orang dari responden tersebut dipilih untuk temubual mendalam. Dapatan kajian menunjukkan terdapat lima faktor yang mendorong belia terlibat dalam kegiatan ekstremisme iaitu faktor psikologi antaranya nilai sendiri rendah dan tahap keagresifan tinggi, faktor luaran iaitu isu dan konflik yang berlaku di negara Islam, faktor ideologi hasil kesalahfahaman dalam agama, faktor individu seperti anti sosial dan naif dan faktor persekitaran seperti media sosial dan ceramah agama yang diikuti.

Kajian berkenaan terorisme di peringkat global telah dijalankan oleh United Nations Office of Counter-Terrorism, Pertubuhan Bangsa-Bangsa Bersatu pada tahun 2017. Satu kajian yang dinamakan “Enhancing the Understanding of the Foreign Terrorist Fighters Phenomenon in Syria” dilakukan bertujuan mengetahui dan memahami fenomena global berkaitan kemunculan pengganas asing yang terlibat dalam konflik ketenteraan di Syria (*transnational terrorism*). Ia merekodkan faktor-faktor ahli kumpulan pengganas ini keluar dari negara mereka dan terlibat dengan kegiatan terorisme di Syria serta alasan dan justifikasi mereka untuk keluar dari kumpulan tersebut dan kembali ke negara mereka walaupun gagal mencapai tujuan dan matlamat seperti yang diinginkan. PBB telah berhubung secara langsung dengan 43 individu yang terlibat dari 23 negara berbeza. Hasil kajian menunjukkan subjek terlibat adalah di kalangan belia, lelaki dan tidak menerima pengajian peringkat tinggi. Subjek sebahagian besarnya kurang pendidikan, mempunyai pendapatan yang rendah di negara asal, ada sebahagiannya tidak bekerja dan tidak mempunyai prospek kerjaya. Bahkan mereka juga dikenal pasti hanya memiliki kefahaman peringkat asas berkenaan Islam.<sup>17</sup>

Beberapa kajian yang dinyatakan di atas mengkaji persepsi belia secara umum terhadap pemikiran ekstremisme. Manakala kajian IYRES dan PBB pada 2017 mengkaji secara langsung profil belia yang terlibat dengan terorisme. Namun, sudut pandang penguatkuasa yang terlibat secara langsung dengan jenayah dan kesalahan ini tidak diberi penekanan walhal mereka merupakan pihak yang berada di barisan hadapan dalam mengenalpasti mereka yang terlibat. Ahli panel pemulihan yang mempunyai akses langsung terhadap setiap tahanan teroris turut mempunyai pandangan tersendiri berkait aspek yang dibincangkan ini. Justeru, kajian ini melengkapkan beberapa kajian sedia ada yang secara khusus meneliti faktor-faktor keterlibatan belia dalam kegiatan terorisme.

### **Metodologi Kajian**

Kajian kes secara deskriptif dipilih untuk kajian ini memandangkan metodenya yang bersifat spesifik dan terfokus iaitu mengkaji faktor-faktor penglibatan belia dengan terorisme. Berdasarkan metode ini, permasalahan dan persoalan sesuatu fenomena melalui sampel yang

---

<sup>17</sup> United Nations Office of Counter-Terrorism, “Enhancing the Understanding of the Foreign Terrorist Fighters Phenomenon in Syria”, 2017.



dipilih dikaji secara mendalam.<sup>18</sup> Pada aspek metode pengumpulan data, temubual secara semi-struktur dan bersemuka dijalankan di mana responden dikenalpasti terlebih dahulu dengan soalan-soalan yang dikemukakan direkabentuk berdasarkan rujukan dan pengesahan pakar. Justeru, kajian ini merangkumi aspek pembangunan instrumen, pengumpulan dan analisis data serta analisis hasil dapatan kajian.

#### Responden temubual

Seramai enam orang responden ditemubual secara mendalam dengan butiran lanjut adalah seperti berikut:

1. Pegawai 1, Unit E8, Bahagian Counter Terrorism, Cawangan Khas, Polis Diraja Malaysia.
2. Prof. Dr John L. Esposito, merupakan profesor Agama, Hubungan Antarabangsa dan Pengajian Islam di Georgetown University, Washington D.C, Amerika Syarikat dan Pengarah, Prince Alwaleed Center for Muslim-Christian Understanding di universiti yang sama. Beliau telah menulis pelbagai buku dan artikel berkenaan Islam termasuk berkait terorisme seperti *Unholy War: Terror in the Name of Islam*, *The Islamic Threat: Myth or Reality?* dan lain-lain.
3. En. Ahmad El-Muhammady bin Muhammad Uthman El-Muhammady, merupakan pensyarah Sains Politik dan pengajian Islam di Universiti Islam Antarabangsa Malaysia (UIAM). Beliau merupakan pakar rujuk Polis Diraja Malaysia berkait kes-kes terorisme serta telah dilantik oleh Kementerian Dalam Negeri sebagai ahli panel deradikalisasi tahanan-tahanan teroris di Penjara Malaysia.
4. Dr Amran Muhammad, merupakan Pengerusi dan Ketua Eksekutif Islamic and Strategic Studies Institute (ISSI Malaysia) serta telah dilantik oleh Kementerian Dalam Negeri sebagai ahli panel deradikalisasi tahanan-tahanan teroris di Penjara Malaysia.
5. Puan Aminah (bukan nama sebenar) iaitu isteri kepada tahanan pesalah di bawah akta POTA.

#### Temubual semi struktur

Temubual secara semi struktur dipilih bagi memberikan kebebasan kepada responden menyampaikan pandangan mereka tanpa terikat dengan peraturan temubual secara khusus. Untuk itu, sebanyak tujuh soalan telah dikemukakan untuk mencapai objektif kajian yang telah ditetapkan. Perincian soalan adalah seperti berikut:

1. Apakah bentuk-bentuk kegiatan terorisme yang dilakukan belia di Malaysia dan luar negara?
2. Apakah faktor keterlibatan belia dengan kegiatan terorisme?
3. Apakah latar belakang belia yang terlibat dengan kegiatan terorisme?

---

<sup>18</sup> Albert J. Mills, ed. *Descriptive Case Study, Encyclopedia of Case Study Research* (California: Sage Publications, 2010), 15.



4. Bagaimanakah bentuk kefahaman belia ini terhadap ajaran Islam?
5. Sejauhmana kecanggihan komunikasi dan capaian informasi memberi pengaruh kepada mereka?
6. Mengapakah faham terorisme terus berkembang di Malaysia?
7. Apakah yang boleh dilakukan oleh rakyat Malaysia dalam membendung faham terorisme?

### **Perbincangan dan Analisis Dapatan Temubual**

#### **i. Bentuk kegiatan terorisme**

Pihak PDRM menetapkan beberapa kegiatan yang boleh dikategorikan sebagai terorisme iaitu seperti berikut<sup>19</sup>:

- a. Menyokong kumpulan teroris.
- b. Menyokong perbuatan teroris.
- c. Menyalurkan dana bantuan kepada kumpulan dan untuk kegiatan terorisme.
- d. Memiliki item-item yang boleh dikaitkan dengan kumpulan teroris.
- e. Mempromosi kegiatan terorisme dan kumpulan teroris.
- f. Menganggotai kumpulan teroris
- g. Menyembunyikan maklumat berkaitan terorisme serta melindungi teroris.

Berdasarkan pengkategorian ini, mereka yang boleh dikaitkan dengan terorisme ialah bermula dari sokongan yang boleh dilihat dari kemampuan memiliki item seperti buku atau dokumen yang menjadi rujukan teroris serta komen, status dan perkongsian yang dilihat menyokong terorisme serta bersimpati terhadap teroris di laman sosial. Pada tahap ini, ia bersifat pencegahan bagi memastikan individu yang dilihat condong menyokong terorisme boleh dipulihkan dengan lebih awal. Berasaskan klasifikasi ini juga, tiada individu yang boleh terlepas daripada sebarang tindakan perundangan sekiranya mereka melibatkan diri dalam terorisme. Pengenalan dan seterusnya penguatkuasaan akta seperti yang telah dijelaskan sebelum ini berperanan penting memastikan pihak berkuasa mampu mengambil tindakan terhadap mana-mana individu yang berpotensi terlibat aktif sehingga seterusnya mungkin direkrut menjadi teroris.

Atas asas tersebut, Akta Pencegahan Keganasan (Prevention of Terrorism Act) atau POTA memberi kuasa kepada polis menahan suspek teroris tanpa waran selama 60 hari. Ahli Lembaga Pencegahan Keganasan yang dilantik dengan perkenan Yang di-Pertuan Agong pula mempunyai kuasa menahan individu terbabit sehingga dua tahun. Manakala Seksyen 4 (1) Akta Kesalahan Keselamatan (Langkah-Langkah Khas) 2012 memperuntukkan penangkapan dan penahanan mana-mana individu berkenaan dengannya boleh dilakukan oleh polis tanpa waran sekiranya dipercayai dia terlibat dalam kesalahan keselamatan. Individu tersebut pula boleh ditahan untuk tempoh selama 24 jam bagi penyiasatan dan, tempoh siasatan tersebut boleh dilanjutkan tidak

---

<sup>19</sup> Pegawai 1, Unit E8, Bahagian Counter Terrorism, Cawangan Khas, PDRM dalam temubual bersama penulis pada 12 Julai 2018 di Bukit Aman.





lebih dari 28 hari bagi membantu penyiasatan.<sup>20</sup> Justeru, POTA berkait pencegahan terorisme secara khusus di samping berperanan memperkasa akta sedia ada iaitu SOSMA yang menjadi akta penting selepas pemansuhan Akta Keselamatan dalam Negeri (Internal Security Act (ISA)).

Kedua-dua akta ini adalah selaras dengan Perkara 149 Perlembagaan Persekutuan yang menetapkan kesalahan terhadap perbuatan subversif, tindakan yang memudaratkan ketenteraman awam dan sebagainya. Sebarang tindakan yang menyebabkan keganasan terancang terhadap orang atau harta, atau untuk menyebabkan sebilangan besar warganegara takut akan keganasan itu adalah tertakluk dalam perkara ini.<sup>21</sup> Di samping itu, ia juga selaras dengan semangat dan tujuan Resolusi Majlis Keselamatan PBB (UNSCR) 2178 dalam memantau dan mengawal selia Militan Penganas Asing (FTFs).<sup>22</sup> Langkah-langkah *counter terrorism* seperti yang dinyatakan dalam resolusi terbabit dimanifestasikan dalam akta sedia ada seperti yang telah dibincangkan di atas.

ii. Faktor keterlibatan belia dengan terorisme

Berdasarkan temubual terhadap enam responden, boleh dirumuskan terdapat sebanyak lima faktor utama yang menarik belia menyertai terorisme iaitu faktor psikologi dan personaliti, faktor pengetahuan dan kefahaman agama, faktor perkembangan media sosial, faktor ideologi dan faktor konflik di negara umat Islam. Ia boleh dihuraikan seperti berikut:

a. Psikologi dan personaliti

Keenam-enam responden secara konsesus bersetuju bahawa faktor utama yang mendorong belia terlibat dengan kegiatan terorisme ialah diri individu yang memiliki sikap dan personaliti yang hampir seponya iaitu nilai sendiri rendah dan tahap psikologi yang tidak stabil.

Ini kerana, sebilangan besar tahanan yang ditangkap dikenalpasti mempunyai latar belakang kehidupan bermasalah seperti dari keluarga yang berkonflik, terlibat dengan penagihan dadah, gaya hidup bebas, memiliki pengalaman masa lalu yang negatif dan sebagainya.<sup>23</sup> Impaknya melahirkan beberapa ciri yang sama iaitu kurang keyakinan diri serta perasaan nilai diri rendah sehingga tidak meletakkan penghargaan diri yang tinggi kepada nyawa dan keselamatan sendiri. Ia turut melahirkan sikap diri yang narsistik iaitu kecenderungan tinggi untuk menjadi 'hero' bagi menampung rasa rendah diri tersebut.<sup>24</sup> Mereka yang dibesarkan dari keluarga bermasalah dan tidak mempunyai hubungan yang rapat dengan ibubapa turut cenderung bersikap anti-sosial dan mempunyai kesukaran bergaul dengan rakan sebaya. Impaknya ialah mereka mencari

<sup>20</sup> Laws of Malaysia, Act 747, Security Offences (Special Measures) Act 2012, 9-10.

<sup>21</sup> Perlembagaan Persekutuan (Kuala Lumpur: International Law Book Service, 2018), 163.

<sup>22</sup> United Nation, Resolution 2178 (2014), Threats to international peace and security caused by terrorist acts, <http://unscr.com/en/resolutions/2178>

<sup>23</sup> Pegawai 1, Unit E8, Bahagian Counter Terrorism, Cawangan Khas, PDRM dalam temubual bersama penulis pada 12 Julai 2018 di Bukit Aman.

<sup>24</sup> En. Ahmad El-Muhammady bin Muhammad Uthman El-Muhammady, panel pakar deradikalisasi tahanan teroris dalam temubual bersama penulis pada 13 Ogos 2018 di ISTAC, UIAM.



‘circle’ di luar norma, berciri subversif dan mampu menaikkan imej diri. Perasaan rendah diri yang terbit dari rasa bersalah dan kemahuan bertaubat turut mendorong sebilangannya menyertai aktiviti yang dianggap ‘jihad’ sebagai satu bentuk penebusan kesalahan masa lalu.

Ciri-ciri ini lebih memberi impak kepada remaja. Keadaan jiwa remaja dalam rentang masa tersebut menunjukkan keadaan psikologi mereka bergelora dalam memilih dan menentukan identiti diri, mudah dipengaruhi persekitaran di samping idealis, bersemangat dan bercita-cita tinggi.

#### b. Kefahaman agama

Salah faham dan salah pentafsiran agama turut menyumbang kepada faktor dorongan ini. Sebahagian tahanan tidak mempunyai fikrah yang jelas berkenaan perjuangan mereka sendiri. Ia dibuktikan apabila mereka gagal memberi penjelasan yang meyakinkan tentang ideologi yang dipegang.<sup>25</sup> Ironinya mereka sangat mementingkan doktrin penubuhan Daulah Islamiyyah atau negara Islam yang diperintah orang Islam dan wajib berhukumkan hukum Allah. Jika syarat ini tiada maka sesebuah negara tidak layak disebut negara Islam sehingga bagi sesetengah yang lebih radikal melihat satu keperluan untuk diperangi pemerintah yang tidak menegakkan hukum Allah walaupun mereka dalam kalangan Muslim. Maka untuk merealisasikan penubuhan negara tersebut, jihad perlu dilaksanakan.<sup>26</sup>

Oleh itu, doktrin *hakimiyyah* yang diangkat sebagai usul iman difahami berbeza dengan kefahaman jumhur ulama. Ini kerana aspek keyakinan berkenaan peletak hukum iaitu Allah SWT adalah suatu dimensi yang membabitkan akidah manakala aspek perlaksanaannya tertakluk kepada dimensi fiqh yang tertakluk pula kepada hukum dan syarat tertentu. Dalam persoalan inilah muncul kelompok radikal yang membangunkan paradigma takfiri melalui pemahaman yang salah terhadap permasalahan di atas. Kelompok ini melihat masyarakat yang kurang sempurna dalam menerapkan hukum-hukum fiqh dianggap telah mengambil hak prerogatif Allah dalam menentukan hukum dan hal itu didakwa sebagai penentangan terhadap-Nya sehingga akhirnya masyarakat ini dikafirkan.<sup>27</sup>

Kefahaman berkenaan aspek ini memerlukan pengetahuan yang mendalam dan pembelajaran yang intensif kerana ia mencakupi aspek akidah dan wacana fiqh. Namun, kajian-kajian yang dijalankan menunjukkan pendidikan agama yang dilalui oleh mereka yang terlibat sebahagian besarnya hanya di tahap sekolah menengah dengan latar belakang kerjaya yang berbeza.<sup>28</sup>

<sup>25</sup> Dr Amran Muhammad, panel pakar deradikalisasi tahanan teroris dalam temubual bersama penulis pada 7 Ogos 2018 di IISI-KRM Kalam Station.

<sup>26</sup> John L. Esposito, profesor Agama, Hubungan Antarabangsa dan Pengajian Islam, Georgetown University, Washington D.C; En. Ahmad El-Muhammady bin Muhammad Uthman El-Muhammady, panel pakar deradikalisasi tahanan teroris dalam temubual bersama penulis pada 13 Ogos 2018 di ISTAC, UIAM;

<sup>27</sup> Usamah Sayyid al-Azhari, *al-Haq al-Mubin fi al-Radd ‘ala man Tala‘aba bi al-Din: al-Tayyarat al-Mutatarrifah min al-Ikhwan ila al-Da‘ish fi Mizan al-‘Ilm* (Abu Dabi: Dar al-Faqih, 2016), 21.

<sup>28</sup> IYRES, *Ringkasan Eksekutif*, 25



Naratif Islam yang dipegang pula dipengaruhi oleh karya-karya ‘jihad’ beberapa tokoh kumpulan radikal Islam.

#### c. Media sosial

Seperti yang telah dinyatakan dalam beberapa kajian di atas, media sosial menjadi medium untuk kumpulan teroris menyebarkan propaganda dan mesej ‘perjuangan’ mereka. Ia dalam masa yang sama menjadi faktor penarik kepada belia yang mempunyai akses mudah terhadap internet untuk akhirnya terlibat dengan gerakan ini. Media sosial seperti Facebook, Telegram Wechat, WhatsApp dan sebagainya dijadikan sumber maklumat untuk mengikuti perkembangan, berkongsi informasi dan berkomunikasi. Kerana itu, terdapat beberapa kumpulan yang dikesan mempunyai portal laman sesawang tersendiri.<sup>29</sup> Bahkan berdasarkan rekod PDRM, Telegram merupakan ruang komunikasi yang paling banyak digunakan kerana bilangan keahliannya yang tidak terhad. Di samping komunikasi pada aspek sebaran maklumat, ia turut digunakan sebagai medium menjalankan sesi baiah taat setia terhadap kumpulan dan pimpinan yang diikuti.<sup>30</sup> Justeru sebarang perbincangan yang berlaku hanya dalam talian dan pada bila-bila masa tanpa mereka perlu berkumpul di sesuatu tempat untuk mengadakan perbincangan. Selain itu, akses mudah dan pantas di beberapa capaian seperti Google dan Youtube turut digunakan oleh mereka untuk mempelajari kaedah membuat bahan letupan, menggunakan senjata api dan lain-lain.<sup>31</sup>

Pada aspek media sebagai bahan propaganda, kumpulan teroris menggunakan pendekatan kecanggihan video bermatlamatkan dua objektif. Yang pertama sebagai medium menarik minat mereka yang berpotensi untuk direkrut dan yang kedua bagi menyebarkan rasa gerun terhadap pihak berkuasa dan masyarakat yang menentang mereka. Untuk objektif yang pertama, video-video serangan terhadap markaz operasi musuh, kejayaan menawan beberapa kota di samping temubual dengan anggota kumpulan sambil disulami alunan bacaan al-Quran yang secara khusus berkait ayat jihad digunakan. Manakala untuk objektif kedua, mesej dalam bentuk amaran dari pimpinan tertinggi, gambar dan video musuh disiksa dan dibunuh serta video pengeboman di sesuatu tempat diaplikasikan bagi mendatangkan rasa takut terhadap mereka.

#### d. Ideologi

Setiap kumpulan apatahlagi yang bermotifkan politik turut mempunyai ideologi perjuangannya. Kumpulan radikal Islam secara umumnya berpegang kepada konsep Tauhid Tiga yang diolah secara radikal. Konsep Tauhid Rububiyah yang berkait pegangan bahawa Tuhan menjadikan alam dan seluruh makhluk diradikalkan sehingga mengimplicasikan kewajipan kepada setiap manusia untuk melaksanakan amalan dan hukum Islam dan kegagalan melaksanakannya

---

<sup>29</sup> Amran Muhammad, panel pakar deradikalisasi tahanan teroris dalam temubual bersama penulis pada 7 Ogos 2018 di IISI-KRM Kalam Station; Puan Aminah, isteri kepada tahanan pesalah di bawah SOSMA dalam temubual bersama penulis pada 19 Ogos 2018.

<sup>30</sup> Pegawai 1, Unit E8, Bahagian Counter Terrorism, Cawangan Khas, PDRM dalam temubual bersama penulis pada 12 Julai 2018 di Bukit Aman.

<sup>31</sup> Ibid.



dihukum kafir dan layak dibunuh. Ia berkait dengan konsep al-Hakimiyyah atau al-Mulkiyyah iaitu Allah satu-satunya pembuat dan peletak hukum dan dengan itu mereka menolak perlembagaan negara yang dianggap sebagai hukum taghut serta menetapkan kewajipan untuk ditubuhkan Daulah Islamiyyah. Tauhid Uluhiyyah berkait kedudukan Allah sebagai Tuhan yang layak disembah beserta penolakan taghut, kufur, nifaq dan perbezaan orang Islam-Kafir serta negara Islam-negara Kafir telah mengimplicasikan penolakan kepada sistem demokrasi buatan manusia, pengkafiran terhadap pendokongnya serta pengisytiharan perang terhadap penguasa dan negara Islam yang dilihat ‘bersubahat’ dengan negara kafir. Manakala Tauhid al-Asma’ wa al-Sifat yang berkait keyakinan Allah memiliki nama dan sifat yang indah mengimplicasikan kepada gejala pemusnahan simbol penyembahan serta peninggalan sejarah.<sup>32</sup>

Justeru, Islam dilihat tidak hanya boleh dikembangkan melalui dakwah semata tetapi juga perlu melalui pelaksanaan jihad. Pengisytiharan jihad pula cukup memadai dengan ‘fatwa’ yang dikeluarkan oleh pemimpin kumpulan tertentu apabila berlaku krisis di negara umat Islam. Dalam konteks inilah ideolog seperti ‘Abd Allah ‘Azzam meletakkan jihad sebagai yang terpenting selepas akidah.<sup>33</sup> Wacana jihad pula diradikalkan pada aspek diharuskan bahkan untuk keadaan tertentu diwajibkan tindakan keganasan seperti pengeboman bunuh diri sama ada di markaz musuh, kawasan awam atau kepada umat Islam yang dilabel pengkhianat. Bagi membezakan tindakan bunuh diri yang menyebabkan dosa besar dalam Islam, Abu Hamzah al-Mazri sebagai contoh menyatakan bahawa perlakuan bunuh diri adalah tindakan peribadi akibat tekanan yang dialami manakala operasi bunuh diri oleh kumpulan ini adalah untuk Allah dan agama-Nya.<sup>34</sup>

Pegangan dan keyakinan ini dikuatkan lagi dengan fenomena semasa yang berlaku dan dikaitkan dengan isyarat akhir zaman serta hadis-hadis nabi SAW berkenaan dengannya. Sebagai contoh, peristiwa yang berlaku di Iraq dan Syria dikaitkan dengan peristiwa perang besar yang dinyatakan akan berlaku sebelum menjelangny hari kiamat. Ia dijadikan sebagai satu propaganda penting untuk menarik belia supaya tidak terlepas dari menyertai ‘perang akhir’ antara muslim dan kafir ini, selanjutnya menggapai syahid dan peluang ke syurga.<sup>35</sup>

#### e. Krisis dan Konflik di negara Islam

Gelombang radikalisme secara umumnya lahir dari krisis yang berlaku di sesuatu tempat.<sup>36</sup> Dalam konteks dunia Islam secara khusus, awal abad ke-20 menyaksikan kebangkitan gerakan

<sup>32</sup> En. Ahmad El-Muhammady bin Muhammad Uthman El-Muhammady, panel pakar deradikalisasi tahanan teroris dalam temubual bersama penulis pada 13 Ogos 2018 di ISTAC, UIAM.

<sup>33</sup> ‘Abd Allah ‘Azzam, *Defense of the Muslim Lands: The First Obligation After Iman*, [https://archive.org/details/Defense\\_of\\_the\\_Muslim\\_Lands](https://archive.org/details/Defense_of_the_Muslim_Lands)

<sup>34</sup> Assaf Moghadam, “Motives for Martyrdom: Al-Qaida, Salafi Jihad, and the Spread of Suicide Attacks”, *International Security*, Vol. 33, No. 3 (Winter, 2008/2009), 63.

<sup>35</sup> Pegawai 1, Unit E8, Bahagian Counter Terrorism, Cawangan Khas, PDRM dalam temubual bersama penulis pada 12 Julai 2018 di Bukit Aman.

<sup>36</sup> John L. Esposito, profesor Agama, Hubungan Antarabangsa dan Pengajian Islam, Georgetown University, Washington D.C



Islamisme berpaksikan politik melalui jalan damai dan tanpa keganasan. Namun tahun-tahun 1970-1990-an menunjukkan kemunculan gerakan bersenjata apabila berlaku pencerobohan USSR terhadap Afghanistan serta pendudukan Israel secara berterusan di wilayah Palestin. Karya-karya tulisan ‘Abd Allah ‘Azzam yang menjadi figur kepada gerakan ini dijadikan sebagai rujukan penting oleh kelompok radikal Islam sehingga ke masa kini. Tulisan *Defense of the Muslim Lands: The First Obligation After Iman* (الأعيان فروض أهم المسلمين أراضي عن الدفاع) menghuraikan kewajipan Muslim mempertahankan Afghanistan dan Palestin serta beberapa fatwa berkenaan jihad pada waktu tersebut manakala karya kedua beliau iaitu *Join the Caravan* menjadi mesej seruan dan motivasi kepada umat Islam untuk menyertai jihad di Afghanistan yang dihukumkan sebagai *fard ‘ayn* kepada semua.<sup>37</sup>

Gelombang kedua berlangsung pasca pengunduran tentera Soviet dari bumi Afghanistan di mana berlaku krisis yang berbeza iaitu tumpasnya gerakan bersenjata di Mesir dan Algeria, campur tangan Amerika Syarikat di Asia Barat dan ancaman berterusan Israel di Palestin. Pemfokusan perjuangan dengan itu beralih kepada musuh jauh iaitu Amerika Syarikat. Latar belakang kepada krisis ini lebih jelas boleh dilihat bersumberkan deklarasi jihad terhadap Israel dan tentera Salib (*Declaration of the World Islamic Front for Jihad against the Jews and the Crusaders*) yang ditandatangani oleh Usamah bin Muhammad bin Ladin (Arab Saudi), Ayman al-Zawahiri (Mesir), Abu Yasir Rifa’i Ahmad Taha (Mesir), Mir Hamzah (Pakistan) dan Fazlur Rahman (Bangladesh). Deklarasi 1998 yang dinyatakan sebagai ‘fatwa’ tersebut menyeru semua umat Islam khususnya beliau untuk membunuh rakyat Amerika dan sekutunya sama ada dalam kalangan tentera mahupun orang awam di mana sahaja dengan matlamat supaya kuasa asing diketuai Amerika keluar dari negara Islam serta tidak lagi memberi ancaman terhadap umat Islam. Seruan tersebut termasuk ‘fatwa’ mengharuskan rompakan kepada pihak yang dinyatakan serta menggulingkan pemerintah yang didakwa bersekongkol dengan kuasa Barat.<sup>38</sup> Dua tahun sebelum itu, Usamah telah mengeluarkan deklarasi perang (*Declaration of Jihad Against the Americans Occupying the Land of the Two Holy Mosques*) yang menjelaskan pegangan dan prinsip perjuang beliau. Seperti ‘Abd Allah ‘Azzam, beliau melihat jihad sebagai kewajipan terpenting selepas syahadah, bahkan dengan pendirian yang lebih radikal iaitu membolehkan pembunuhan orang awam serta pemusnahan infrastruktur awam sekiranya perlu.<sup>39</sup>

Krisis yang mencetuskan gelombang ketiga boleh dikatakan bermula pada 19 Mac 2003 apabila Amerika Syarikat melakukan pencerobohan ketenteraan ke bumi Iraq. Ketidaktentuan dan konflik terus berlanjutan apabila berlakunya kebangkitan revolusi musim bunga atau Arab Spring yang bermula di Tunisia pada tahun 2010 dan seterusnya merebak ke beberapa negara

<sup>37</sup> ‘Abd Allah ‘Azzam, *Defense of the Muslim Lands: The First Obligation After Iman*, [https://archive.org/details/Defense\\_of\\_the\\_Muslim\\_Lands](https://archive.org/details/Defense_of_the_Muslim_Lands); ‘Abd Allah ‘Azzam, *Join the Caravan*, <https://ebooks.worldofislam.info/ebooks/Jihad/Join%20the%20Caravan.pdf>

<sup>38</sup> World Islamic Front Statement, Declaration of the World Islamic Front for Jihad against the Jews and the Crusaders, 23 Februari 1998.

<sup>39</sup> Usamah bin Ladin, Declaration of Jihad Against the Americans Occupying the Land of the Two Holy Mosques, London: al-Quds al-‘Arabi, 1996.





lain termasuk Syria. Kumpulan radikal Islam telah mengambil kesempatan atas ketidakstabilan yang berlaku dengan menawan beberapa lokasi, mengisytiharkan penubuhan negara Islam dan mengimplementasikan apa yang disebut sebagai hukum syariat. Ia merupakan gelombang yang memberi impak paling besar dan popular kerana ISIS direkodkan berjaya mengumpul hampir 30,000 pejuang dari negara asing, aset bernilai \$2 bilion serta menguasai wilayah luas antara Iraq dan Syria ketika zaman kemuncaknya.<sup>40</sup> Ideolog utama mereka ialah Abu Mus'ab al-Zarqawi yang merupakan Amir *Tanzim Qa'idah al-Jihad fi Bilad al-Rafidayn* iaitu cabang organisasi al-Qa'idah di Iraq dan Abu Bakr al-Baghdadi yang mengisytiharkan dirinya selaku khalifah seperti yang telah dijelaskan sebelum ini. Karya tulisan strategis al-Qa'idah, Abu Bakr Naji iaitu *The Management of Savagery* berkenaan kaedah penawanan sesebuah negara dijadikan teks utama perjuangan. Tidak seperti aktiviti serangan yang dilakukan secara rawak oleh Usamah, bentuk perjuangan ISIS bersifat tradisional dengan mempunyai wilayah tersendiri. Al-Zarqawi melalui video-video propagandanya pula menunjukkan perjuangan bersenjatanya sebagai 'cool' dan untuk anak muda.

Oleh itu, konflik di Asia Barat seperti di Syria dan Iraq serta di Nusantara seperti di Mindanao, Selatan Filipina telah menarik belia Malaysia untuk membantu nasib saudara seagama. Tambahan pula konflik yang berlaku tersebut disebabkan campurtangan kuasa asing dari Barat yang dilihat sebagai tindakan penindasan dan penaklukan secara berterusan terhadap Islam dan umat Islam. Faktor atau motivasi utama penglibatan mereka bermula dengan rasa simpati terhadap penganut seagama yang ditindas. Gambaran kelompok Sunni di Syria yang digambarkan ditekan dan diserang kerana kepercayaan mereka oleh kerajaan Assad yang berfahaman Syiah adalah antara pendorong utama penglibatan mereka. Perasaan ini kemudian berkembang sehingga mereka merasakan suatu kewajipan agama untuk membela kelompok sealian yang tertindas dan dalam masa yang sama menjatuhkan kerajaan kafir dan zalim tersebut.<sup>41</sup> Pihak ISIS sebagai contoh menggunakan terma 'hijrah' untuk menarik belia menganggotai kumpulan mereka, iaitu penghijrahan dari keselesaan hidup di negara asal dan menuju ke negara Islam yang memerlukan pengorbanan jiwa dan 'jihad bersenjata.'

## Kesimpulan

Kelima-lima faktor yang dihuraikan di atas adalah saling berkait dan melengkapi sehingga melahirkan dorongan belia untuk terlibat dengan terorisme. Lima faktor ini juga boleh dikategorikan kepada faktor penarik dan penolak atau faktor dalaman dan luaran. Faktor penolak ialah keadaan diri individu itu sendiri serta kefahaman agama yang dimiliki. Manakala faktor penarik ialah konflik dan penaklukan yang dilakukan oleh kuasa Barat di negara umat Islam. Medium yang menjadi faktor penarik tersebut pula ialah media sosial. Oleh itu, keterlibatan belia tidak berpunca dari hanya satu faktor tetapi pelbagai faktor yang saling berkait dan mempengaruhi.

<sup>40</sup> Patrick Cockburn, *The Rise of Islamic State: ISIS and the New Sunni Revolution* (London: Verso, 2015), 3.

<sup>41</sup> United Nations Office of Counter-Terrorism, "Enhancing the Understanding of the Foreign Terrorist Fighters Phenomenon in Syria", 2017.





Berdasarkan faktor ini juga, ia membentuk pola pemikiran belia untuk akhirnya terlibat dengan kegiatan radikal. Ia bermula dengan pendedahan yang diperolehi di media sosial berkenaan konflik dan peperangan yang terjadi di beberapa negara Islam, disulami oleh perasaan untuk membantu di samping keinginan narsistik akibat rasa rendah diri sehingga melahirkan keinginan kepada mereka menyertai kumpulan tertentu. Dengan pengetahuan agama yang cetek, mereka dimanipulasi dengan doktrin dan ideologi sesuatu kumpulan sehingga bay'ah sebagai satu komitmen taat setia dilakukan dan akhirnya ia membawa kepada tindakan.

Walapun peratusan mereka yang terlibat adalah kecil namun ia tidak boleh diambil ringan kerana ideologi yang disebarakan berlaku secara senyap dan rahsia. Dalam konteks Malaysia sebagai negara majmuk, doktrin yang tidak menerima kepelbagaian pandangan boleh membawa kepada ketegangan antara kaum dan akhirnya konflik berdarah. Ia turut memberi imej negatif kepada kesucian agama Islam yang jika bersandarkan naratif ini menggalakkan perseteruan, peperangan dan keganasan.

Apatahlagi tewasnya ISIS di kubu terakhir mereka di Baghuz sempadan Syria dan Iraq telah melahirkan satu gelombang krisis yang baru. Abu Bakr al-Baghdadi dalam video pertama beliau pada April 2019 selepas lima tahun 'menghilang' telah menyeru para pejuang dan penyokongnya melakukan serangan secara '*lone wolf*' dan rawak di pelbagai tempat berkepentingan di negara masing-masing. Beliau turut memuji tindakan pengeboman gereja di Sri Lanka yang mengorbankan 250 nyawa pada 21 April 2019 sebagai satu contoh tindakan yang boleh dilakukan.<sup>42</sup> Seruan lebih jelas dan tegas oleh Abu Mus'ab al-Suri dalam tulisannya *Global Islamic Resistance Call* beberapa tahun sebelum itu yang mengajak mereka yang menyokong perjuangan tersebut untuk melakukan serangan bersendirian khususnya di Barat tanpa perlu melalui organisasi pusat. Justeru, propaganda seperti yang dilakukan al-Baghdadi dan tulisan taktikal oleh al-Suri ini menunjukkan kemungkinan ancaman keganasan boleh berlaku di mana sahaja dan membabitkan sesiapa sahaja. Tambahan pula, tewasnya ISIS turut menyaksikan tahanan-tahanan yang terlibat untuk mula pulang ke negara asal masing-masing. PDRM mencatatkan bahawa seramai 40 warga Malaysia yang ditahan di Syria dan dipercayai terlibat dengan kegiatan militan ISIS merayu untuk pulang ke tanah air.<sup>43</sup>

Beberapa siri gerakan dan perkembangan radikalisme sehingga seterusnya melahirkan terorisme telah menunjukkan kegagalan setiap kumpulan radikal dalam mencapai matlamat utama perjuangan mereka iaitu untuk umat Islam secara massa menyokong dan menyertai mereka. Selain beberapa akta sedia ada yang dikuatkuasakan untuk langkah pencegahan, aspek pendidikan berteraskan pegangan tradisi ulama Ahli Sunnah wal Jamaah perlu terus diperkasakan. Detradisionalisasi pengajian agama atas kehendak pembaharuan dan pemodenan

<sup>42</sup> The Guardian, Isis leader Baghdadi appears in video for first time in five years, <https://www.theguardian.com/world/2019/apr/29/isis-leader-abu-bakr-al-baghdadi-appears-in-video-for-first-time-in-five-years>.

<sup>43</sup> Sinar Harian, 40 tahanan Malaysia di Syria mahu pulang, <https://www.sinarharian.com.my/article/51859/BERITA/40-tahanan-Malaysia-di-Syria-mahu-pulang>.



seperti yang diperjuangkan oleh beberapa tokoh pembaharuan pada abad ke-19 dan abad ke-20 perlu dinilai semula. Ini kerana pembaharuan yang diingini itu sebaliknya melahirkan kumpulan-kumpulan radikal yang hanya berpegang kepada versi agama yang sempit dan tegar. Pendekatan atau manhaj akidah ulama Nusantara yang sederhana antara pegangan melampau dan liberal telah menyaksikan perkembangan Islam yang aman tanpa perseteruan dan keganasan. Justeru proses retradisionalisasi perlu dibugarkan lagi khususnya melalui jalan pendidikan dengan anak-anak muda diperkenalkan semula dengan karya-karya ilmuan Islam bermanhaj sederhana atau wasatiyyah.

### **Penghargaan**

Makalah ini merupakan sebahagian input kajian “Faktor dan Implikasi Sosial Tren Pemikiran Terorisme Dalam Kalangan Generasi Y di Malaysia” (FP022-2017A), Skim Geran Penyelidikan Fundamental (FRGS). Penulis merakamkan penghargaan kepada Kementerian Pendidikan Malaysia kerana mendanai kajian ini.

### **Rujukan**

- ‘Azzam, ‘Abd Allah, Defense of the Muslim Lands: The First Obligation After Iman, [https://archive.org/details/Defense\\_of\\_the\\_Muslim\\_Lands](https://archive.org/details/Defense_of_the_Muslim_Lands).
- ‘Azzam, ‘Abd Allah, Join the Caravan, <https://ebooks.worldofislam.info/ebooks/Jihad/Join%20the%20Caravan.pdf>.
- Ahmad El-Muhammady bin Muhammad Uthman El-Muhammady, panel pakar deradikalisasi tahanan teroris dalam temubual bersama penulis pada 13 Ogos 2018 di ISTAC, UIAM.
- Amran Muhammad, panel pakar deradikalisasi tahanan teroris dalam temubual bersama penulis pada 7 Ogos 2018 di IISI-KRM Kalam Station.
- Astro Awani, 10 fakta anda perlu tahu tentang SOSMA, <http://www.astroawani.com/berita-malaysia/10-fakta-anda-perlu-tahu-tentang-sosma-76148>
- Astro Awani, Bom Movida: Dua lelaki dipenjara 25 tahun, <http://www.astroawani.com/berita-malaysia/bom-movida-dua-lelaki-dipenjara-25-tahun-137227>
- Astro Awani, K'jaan sedia kertas putih kegiatan keganasan libatkan rakyat M'sia, <http://www.astroawani.com/berita-malaysia/kjaansedia-kertas-putih-kegiatan-keganasan-libatkan-rakyat-msia-47177>
- Astro Awani, RUU Pencegahan Keganasan 2015 (POTA) dibentang di Dewan Rakyat, <http://www.astroawani.com/berita-malaysia/ruu-pencegahan-keganasan-2015-pota-dibentang-di-dewan-rakyat-56747>
- Balu Pejuang Negara Islam Terbunuh Di Syria Pulang Ke Malaysia, <https://www.benarnews.org/malay/berita/my-wanita-syria-181025-10252018185716.html>
- Che Mohd Aziz Yaacob et. al., Tahap Kefahaman dan Potensi Penerimaan Pelajar IPTA Terhadap Gerakan ISIS. Kuala Lumpur: Unit Penerbitan IYRES, 2016.
- Cockburn, Patrick. *The Rise of Islamic State: ISIS and the New Sunni Revolution*. London: Verso, 2015.



- Department of Homeland Security, Centre of Excellent University of Maryland, Study of Terrorism and Response to Terrorism, <http://www.start.umd.edu/research-projects/global-terrorism-database-gtd>.
- Institut Penyelidikan Pembangunan Belia Malaysia, Kajian Pembangunan Kesejahteraan-Pendidikan Agama dan Penglibatan dalam Gerakan Islam Radikal di Kalangan Belia Malaysia, 2015.
- Institut Penyelidikan Pembangunan Belia Malaysia, Kementerian Belia dan Sukan Malaysia, Ringkasan Eksekutif Profil Belia dalam Kegiatan Ekstremisme. Putrajaya: KBS, 2017.
- John L. Esposito, Profesor Agama, Hubungan Antarabangsa dan Pengajian Islam, Georgetown University, Washington D.C.
- Kamarulnizam Abdullah, “Kumpulan Mujahidin Malaysia (KMM) and Jemaah Islamiyah (JI): The links. *Journal of Policing: Intelligence and Counter Terrorism* (2009), 29-46.
- Laws of Malaysia, Act 747, Security Offences (Special Measures) Act 2012.
- Malaymail, Islamic State recruiter targeted local schoolboy, police say, <https://www.malaymail.com/news/malaysia/2014/10/14/islamic-state-recruiter-targeted-local-schoolboy-police-say/763167>
- Mills, Albert J. ed. *Descriptive Case Study, Encyclopedia of Case Study Research*. California: Sage Publications, 2010.
- Moghadam, Assaf. “Motives for Martyrdom: Al-Qaida, Salafi Jihad, and the Spread of Suicide Attacks”, *International Security*, Vol. 33, No. 3 (Winter, 2008/2009): 46-78.
- Nursalihah Ahmad Raston et. al., Faktor-Faktor Yang Mempengaruhi Kecenderungan Keterlibatan Belia di Malaysia dalam Gerakan Islam Radikal. Kuala Lumpur: Unit Penerbitan IYRES, 2016.
- Nursalihah Ahmad Raston et. al., Persepsi Belia di Malaysia Terhadap Jihad dan Gerakan Islam Radikal. Kuala Lumpur: Unit Penerbitan IYRES, 2016.
- Pegawai 1, Unit E8, Bahagian Counter Terrorism, Cawangan Khas, PDRM dalam temubual bersama penulis pada 12 Julai 2018 di Bukit Aman.
- Perlembagaan Persekutuan. Kuala Lumpur: International Law Book Service, 2018.
- Rapoport, David, The Four Waves of Modern Terrorism, (<http://international.ucla.edu/media/files/Rapoport-Four-Waves-of-Modern-Terrorism.pdf>).
- Statistik tangkapan elemen Daesh dibawah POTA, Portal Data Terbuka Malaysia, [http://www.data.gov.my/data/ms\\_MY/dataset/statistik-tangkapan-elemen-daesh-dibawah-pota-2014-2017/resource/74a08629-654e-4927-b8a4-6c734ea1019f](http://www.data.gov.my/data/ms_MY/dataset/statistik-tangkapan-elemen-daesh-dibawah-pota-2014-2017/resource/74a08629-654e-4927-b8a4-6c734ea1019f)
- The Guardian, Isis leader Baghdadi appears in video for first time in five years, <https://www.theguardian.com/world/2019/apr/29/isis-leader-abu-bakr-al-baghdadi-appears-in-video-for-first-time-in-five-years>.
- United Nations Office of Counter-Terrorism, “Enhancing the Understanding of the Foreign Terrorist Fighters Phenomenon in Syria”, 2017.
- United Nation, Resolution 2178 (2014), Threats to international peace and security caused by terrorist acts, <http://unscr.com/en/resolutions/2178>



Usamah bin Muhammad bin Ladin. Declaration of Jihad Against the Americans Occupying the Land of the Two Holy Mosques. London: al-Quds al-‘Arabi, 1996.

Usamah Sayyid al-Azhari. *Al-Haqq al-Mubin fi al-Radd ‘ala man Tala`aba bi al-Din: al-Tayyarat al-Mutatarrifah min al-Ikhwan ila al-Da’ish fi Mizan al-‘Ilm*. Abu Dabi: Dar al-Faqih, 2016.

World Islamic Front Statement, Declaration of the World Islamic Front for Jihad against the Jews and the Crusaders.